

澤雅堂詩二集

澤雅堂詩二集卷九目錄

述事篇寄呈許希庵師

漫興二十首

送孫澐東歸

遲暮

贈羅甫生三首

秋心四首

疏勒中秋

贈陳棣芬

再用秋心韻答棣芬子相

余作秋心四章諸公和者咸有愁感之語作此解之

夜大風作

送甫生

題子相秋懷二十首後

送棣芬東歸

天意二首與子相

和子相詠雪

雪中與子相飲酒

飲酒一首與子相

易上達直庭以病中雜感詩見示作此慰之
病起

輓易直庭

澤雅堂詩二集卷九

烏程施補華均父

述事篇寄呈許希庵師

孤兒昔零丁抱書向天哭先生聞愴然招就西齋讀西
齋小如舟插架多篇牘先生有才子研席相連屬凌晨
伴諷誦彼此百行熟向夕揖先生孤兒還破屋阿母治
晚餐菜羹雜豆粥室鐙光幽幽微紅漸成綠阿母坐絡
絲軋軋盈一軸孤兒在母旁展書吟斷續東鄰雞再鳴
黯淡吹鐙宿如是亦有年蓼蟲長食蓼老鴟忽夜唳狐
鬼相擊觸先生曰不祥此類賈生鵬孤兒請驅之狐鬼

果惴伏先生語孤兒福命是堪卜明年桂樹秋先生歌
鳴鹿孤兒送先生公車馳轆轤維時大江南豺虎食人
肉今日營壘傾明月郡縣覆火光遙夜紅殺氣炎天肅
斯民魚在網濺濺生機蹙先生試禮闈兩則未開璞欲
還途路梗欲住飢寒促作客燕齊間歸心託鴻鵠孤兒
練鄉兵志在救邦族觸怒縉紳老萬端飛謗讟一夕湖
州摧全家泰山籙居然得完聚祖德天爲福自是走賊
中十日九枵腹雙林及同里母子淚盈掬先生歸未歸
眸子嗟已睽烽煙滿故鄉卒歲滬之濱越同治三年七
月湖州復孤兒負母還空巷白日速野鼠千萬羣跳跟

不勝捉髑髏多於瓜殘血猶漉漉黃蒿塞門闥開徑試
鋤劓敗牀堆破卷忍餓且呻吟先生亦歸來空囊頗羞
縮時時覓孤兒叩門聲剝啄先生曰吁嗟吾困盲於目
異彼心盲人扣槃與捫燭回憶西齋游孤兒進所學經
術並詞章徐徐出商摧孤兒貢於鄉旋脫諸生服才子
復繼之文采兩郁郁先生大歡喜爾輩繼吾躅會當作
夔龍天衢共騰蹕斯言竟不驗孤兒四十足發憤西從
軍投筆堪橫槊胠篋保城隅墮馬太行麓風雨渡黃河
馨香祈華嶽其日雲冥冥十里失遐矚須臾巖壑開煙
鬢似新沐退之石廩異神意儼來告道出崆峒陽涇流

一何濁皋蘭俯亭亭金城在平陸再拜謁相公許我言
所欲始言仰威名管葛才卓犖瑁璠趨轅門良禽知擇
木次言關隴平蛇豕半誅戮新疆二萬里遁逃肆荼毒
譬彼救燎原餘火猶未撲回準亦王人畛域公勿囿聞
言顧而笑汝材匪凡碌幕府居二年實以奇士畜新疆
初用兵太白光煜煜孤兒治文書出入參帷幄籌策日
有陳往往關全局其一計軍儲芻茭及種桂其二算軍
器干戈及饒錫地圖按夷險天時備寒燠相公每用之
嫉忌同僚蓄先生寄書來汝性無委曲恃才恃知遇不
退將聚斂逾年新疆平天日開昏瞶出塞就張公意在

避謠譏遙遙路五千勞矣痛我僕虜擊薄勿爲鼠偷寬
未鞫溝瀆卒自經祇歎官箴辱同僚肆羅織改姓宜稱
蝮曾參不殺人慈母信之夙三告竟投杼冤哉樓蘭獄
裴相在中書處厚遭斥逐富相鎮汝南簿責到山谷古
人亦有之吾豈自號譽張公朝曰吁鍛翮此鸞鸞張公
暮曰吁折足此騏驎冬寒復有春晦盡將爲朔一龍還
一虵日以韜藏勗先生復寄書慰勉情彌篤祿位後萬
夫名山猶著錄去年溫宿城閉戶養幽獨張公遺材官
月繼肉與粟今年赴疏勒軍諮更榮擢馮婦攘臂前士
笑增慚惡先生三寄書功名將大褫鏡瑩由此磨玉美

加以琢韓門稱籍湜李翱尤卓卓當其賦幽懷憂世思
一淑仕宦身不華貶斥命遭剝他年山南東卒領數州
牧孤兒視習之如以升比斛狐鬼或預知華靈或先覺
晚霞五色飛光采勝朝旭峩峩昆侖邱孤雲天一握登
臨望中原百郡牛毛族何時客到家塵土親洗濯徘徊
阿母墳松柏風謾謾歸來謁先生清若傲霜菊病眼喜
重開扶持語繁複悠悠竟未期荒戍聽哀角吳歌安得
聞但有龜茲樂越姦那可致蒲萄兼苜蓿甌脫分漢兵
支離問回俗孤兒復有兒長者踰十六才子屢生子庭
階繞蘭玉作詩付童稚淵源思有俶述事知艱難勿效

初生犢三世作通家兩小堪同塾先生一粲然息壤吾
已築清聲聽雛鳳矯羽望孤鸛

漫興二十首

陽關西去七千里東望黃河日夜流誰信黃河東入海
吾家還在海東頭

天邊立馬鬢如絲奇興橫生亦有時十萬貔貅三五月
昆侖邱畔夜吟詩

解衣談笑風生坐將略詩才兩不降行遍玉門關外路
將軍第一客無雙

睡餘小閣茶初熟客去閒庭花正開只有蒼蠅忙不了

滄牙生青二生
一時簾幕百回來

鏡中鬚鬢日蕭蕭萬里奇功不可邀
嬾對文書疏見客
非愁非病但無聊

縮項鰓魚入饌鮮
哺雞竹筍不論錢
楊梅爛熟枇杷美
坐憶湖鄉五月天

耿恭舊井班超宅
絕域安知掌故留
七十纏回通漢語
青年曾侍小楊侯

不見和闐無價璧
精華或者闕山川
先生正讀河東集
三復零陵乳穴篇

去年栽花溫宿國
今歲栽花疏勒城
姹紫嫣紅開滿眼

老夫一笑大功成

羅氏小園廊舍東一樹石榴嬌午風天遣不爭桃杏豔
春光過了十分紅

邊城十日九日風塵土撲面黃濛濛麥苗怒向風中長
但恐雨來生百蟲

俄羅斯花開未開山頭六月雪皚皚央哥騎馬巴郎擔
知自天方朝祖來

老夫騎馬健兒笑上馬人持下馬扶白浪如山舟似葉
健兒還笑老夫無

天主耶穌各一家流行景教入中華如何世上癡兒女

猶向西方禮釋伽

彗星一丈天西北芒角森森近帝車祇恐靈臺諸太史
上書還欲頌含譽

研經室裏藏書富都付咸豐劫火焚今日儀徵門下士

白頭留得一孫雲

孫宜生疏
勒相見

聞道天方舊典型阿渾慈善帝神靈年來學得胡僧技
飽喫黃羊誦黑經

緩帶但聞羊太傅投壺唯有祭將軍我論人才先本色
彎弓躍馬勝能文

史才經學兩粗疏薄有文名不自居歸去羊求猶可伴

時來管葛定何如

桂樹香圍禪老室荷花紅入酒人船將軍約我功成去
分領西湖二十年

送孫雲東歸

少年偏宕壯年窮老去邊庭逐斷蓬涕淚相攜疏勒遠
衣冠猶及道光中金甌破碎天心轉銅狄摩挲我意同
歸對江山如夢裏中興人物始衰翁

呼牛呼馬已知謗聞道猶嫌晚未能心事對花仍宛轉
口才得酒尙峻嶒萬言將盡須存我四海無歸莫愛僧
消受暮年隨處好藥爐茶竈與書鐙

送客迢迢算客程過江應及雪初晴吳音越調全通話
水市山邨半記名興到會稽看竹去書來陽羨買田成
扁舟待我東歸日阜帽青鞵一笑迎

遲暮

卷簾東海月似爲老夫來高館秋先覺幽花夜更開飄
零猶有託遲暮自憐才歸話崑崙頂題詩亦壯哉

贈羅甫生三首

瀟湘一片月萬里爲君來照見題詩處崑崙翠作堆敬
牛談國俗盤馬試邊才鼎鼎年華盛慚余鬢已摧

森森城北路孟氏有名園把酒林中客談詩水上軒春

來移節遠我到落花繁君又尋秋至離情與鶴言
西征方建節南郭濫吹竽壯志隨年減虛名與謗俱相
逢車下揖同作府中趨文字休嗟賞唯堪記八愚

秋心四首

登高真識楚臣悲颯颯秋風動鬢絲白雁又飛爲客日
黃花未及解兵時猗猗遺種經甘肉混沌新民強畫眉
名將不多良吏少悠悠空計治安期

四山晴雪夜茫茫掩映軒楹誤曙光萬里孤雲長作客
一年明月各思鄉老來已分功名薄醉裏終憐議論狂
中外其欣和約定詩成聊欲壓歸裝

是夕
中秋

龍蛇虎鼠變如何執戟詼諧自不磨天闕星辰光已黯
侯門仁義頌還多儻逢盛世徵干羽應其幽人怨薜蘿
誰信書生投筆起青春白日久蹉跎

命宮磨蝎似韓蘇文學官資兩不符邊事偶尋兵子語
鄉心欲與釣徒俱舊書白髮從頭讀美酒烏程滿眼酤
功狀謗書均莫問歸來端合字潛夫

疏勒中秋

眼中一明月正映昆侖墟心中一明月乍出東海隅兩
月本一月心眼抑何殊舉杯月當席徒侶相與俱心眼
默自領徒侶方歌呼不知東海隅看月心何如明月在

胡天下照萬穹廬幾見我輩人長吟冰雪都嫦娥應一
笑佳節今不孤寄謝東海隅望遠勿躊躇人事百不遂
清霜鬢鬢有情此明月萬里猶知余

贈陳棣芬

杜陵晚歲游衡湘孤舟春水淹耒陽飢腸雷鳴得一飽
肥牛美酒翻成殃平生高摘屈宋豔遺蛻卽在騷人鄉
詩魂去來風颯颯巖花渚草搖芬芳至今千載足思慕
邑子往往工篇章綿駒善歌齊石化耒陽正復如高唐
西來不見周陽五蕘山行五
借用之觀其殘墨皆琳瑯陳君才
筆與周亞同袍萬里親戎行甫也諸侯老賓客用杜
語張

公禮數尤周詳議論常推國士列酒醴時設軍書旁青
油幕下互談笑賦詩贈我傾肝腸班超高適廣徵引氣
勢排比詞鋪張杜陵一途君已得嗟余才薄甯相當余
詩況比杜陵叟但窺門戶難升堂與君旗鼓敢並樹楚
人百倍鄒人強歲云暮矣天隕霜煙鴻叫侶方南翔防
秋旌旆從風揚余頭已白君顏蒼酒酣走上崑崙岡中
原一髮迷所望楚山何處吳山長從軍雖樂老堪傷書
生不合圖

紫光出塞歌行杜陵體明年從此壓歸裝

再用秋心韻答棣芬子相

潯水東西卓女悲白頭聊復念朱絲游龍失路空千里
病鶴乘軒又一時畫策最虞垣有耳觀餅況列井之眉
年來痛定能思痛晚日桑榆或可期

仙山樓閣影微茫風引船開但水光從此夷猶泊宦海
輸他款段老家鄉十年盤錯應知利一笑模稜漸不狂
醉裏依然心慷慨寶刀拚用百金裝

防秋無奈感秋何眉鼻年年墨自磨邊事幾人談虎變
軍功一例爛羊多激昂私論風吹水慚媿移文月罷蘿
仕宦未成歸未得傭書擔糞兩蹉跎

客心初感病初蘇弄筆聊同鬼畫符二妙篇章何處得

九天珠玉與之俱花如親友垂垂盡酒勝茶湯薄薄酤
牢落暫爲文字飲行窩安樂媿堯夫

余作秋心四章諸公和者咸有愁感之語作此解之

春來自榮秋自凋落葉不怨驚風飄羈人志士百感集
撫樹卻恨風蕭條恨者徒恨落還落不落未必無牢騷
好花佳月亦惆悵此恨豈恃秋聲招不知含恨竟何益
空令兩鬢添霜毛人生窮達天所定人力微薄權難操
天耳下聽含恨語切切不抵塞蟲號四五十未衰憊
肌理尙實牙齒牢時來八州可持節運去五湖堪放櫓
貴仕由人隱由我非仕非隱嗤吾曹一物繫空兩無著

百年何苦如枯匏
白酒新溫日將夕
黃菊亂放秋已高
賦詩吾欲出禁體
務棄愁窮歡嘲

夜大風作

狂飈破空來洶若海潮湧
孤鐙黯將滅四壁森欲動
勢迴倏卷幔力併還衝孔
蒼犬無停噪廚鼠忽對拱
秋隨落葉盡夜入虛衾永
一心支震撼百響絕疑恐
飛騰志仍壯摧折氣愈勇
櫪馬蹏怒踠鴈骨奮聳雞鳴吾亦起
窗月如流永

送甫生

君去迦師城邊柳正飛絮
君來迦師城柳衰秋又暮
觥

觥清河公仁武君所慕持尊祝其壽五十當初度幕府
多才賢一半君雅故余實山野愚老不通世務開口擬
古人動與時流忤詩文小時技約略識家數落筆頗自
矜棄去旋不顧以此兩無成元髮至垂素君獨喜其然
屈損相親附孟氏百畝園近在城北路園中何所有黃
葉參差樹樹閒亭榭幽君昔尋詩處竭來拓南軒厚豁
得高據要令主作賓日涉其成趣軍伶抹青紅升場曲
多誤適堪共一笑滿席酒傾注停觴忽不飲朗詠登高
句和章咸勿敵愛極翻生妬嘉會冀可常荏苒君又去
車馬日夜東天山莽回互明年洞庭船春水迷津渡鼓

柑發長謠拍拍起鷗鷺萬里憶清河旌旆西陲駐坐中
有揖客慙類汲長孺桃李爛漫開養疾名園住作詩遠
懷思塞鴻歸可付

題子相秋懷二十首後

吁嗟蕉萃士實感秋氣生呱呱一墮地卽具悲苦情悲
苦亦萬端隨在相與迎豈無開口笑暫獲甯久憑譬彼
春樹花九雨得一晴稍稍弄顏色狂風吹落英天於衆
萬內予汝以聰明誠厚不爲薄宜愛非所憎何爲縱憂
患日夜銷臣精胡霜忽霏霏歲晏百草零遂令蔣子詩
慘作秋笳聲身世備諸戚訴天天勿鷹爲我語蔣子自

立天可爭一心經百苦思慮堅且凝一身習百勞筋骨
老更成乾坤有震蕩天不扶其傾要恃二三輩孤力相
支撐天非極厚愛使汝榮樂并蠕蠕一裸蟲生死無重
輕

送棣芬東歸

揚帆星海闊立馬天山高淋漓飛檄筆璀璨藏鞞刀長
揖備賓客遠塞依旌旄傾懷自上將託契仍吾曹賦詩
動十和得酒欣一招歡會輒善感正論時襍嘲在暱許
脫略居荒忘寂寥歸心一夕動夢繞瀟湘皋起來北風
怒萬木聲蕭條上書乞長假命駕次近郊浩然入關去

征衣雪飄飄士不登玉堂迴翔鸞鳳巢卽當提琬戈發
揮龍豹韜金印縛其肘功成顏未凋崢嶸

紫光閣七尺圖英標千軍一顧盼凜凜寒生毛奈何蝨
其閒但任文書勞揣人腹中語俯仰如桔槔官職有高
階將帥有深交兀兀磨盾鼻惜哉雄心消不若江之滸
散髮敲漁舸坐看鷗鷺飛隨意歌且謠君計良已得吾
肯尹颺揉作書付老妻破屋加新茅行當遠歸來塵土
洗征袍百畝開園池竹筍兼魚苗歲時會親友自足山
居豪

天意二首與子相

天意蒼茫白髮生新詩字字作邊聲

詔書遠聽通和好時事旁觀咎老成回憶六橋敲短棹
相期萬里請長纓如今共作將軍客且撥憂危講治平
淪落棲遲未有涯還思出處應龍虵深心自撥寒爐火
老眼留看病樹花顧盼風雲生絕塞挽回天地入中華
疏更斷續清無寐知是籌邊是憶家

和子相詠雪

疏勒城頭雪皚皚蔣子賦詩清且哀十年布被無暖氣
夢魂不到孤山梅老施誦之三歎息羈臣絕徼何有哉
苦無燕玉足送老安得越釀同歡懷凍墨自書寒瘦語

險韻欲鬪尖叉才老施罷吟夜寥寂一念忽召春風回
黃蜂紫蝶宛飛舞桃李無數心花開崑崙照眼峯巒變
南高北高青崔巍明湖卽在渤海裏畫船還往波濤洄
意想所至出形象倏如彈指成樓臺甯知此老鴉瑟縮
鐵筋自撥紅爐灰明朝開戶積三尺騎馬不辨東西街
白米方憂市價貴黃棉乍喜戎衣裁蔣子新詩勿再作
試呼吹律鄒生來

雪中與子相飲酒

萬古崑崙雪無人一賦詩我來花亂墜客至酒同持孤
悶筵前破奇塞戶外知醉邀王母語益地獻何時

詩律如兵律還憑運用奇幾人誇手敏一笑許心知酒
罷寒疑減茶甘渴可支我歌君且和度此雪飛時

飲酒一首與子相

從軍二萬里直歷昆侖阿三冬風凜冽羣壑冰蹉跎幕
府治文書手凍誰爲呵擲筆且持杯綠酒鱗鱗波老蔣
骭麟人與我真同科招來便共飲卽席或短歌不怨去
日速但求來日多百年尙有半白髮如我何鮮妍夭桃
姿偃蹇喬松柯歲晏定榮悴勿賴春陽和興至拚一醉
爾我非蹉跎

易上達直庭以病中襍感詩見示作此慰之

聽慣陰山敕敕歌相逢講藝正投戈沈詩任筆才無敵
何肉周妻累不多老去參禪諸相滅秋來裹飯幾人過
鼠肝蟲臂天機在一卷南華治病魔

新詩字字意淒清敲枕應知夢未成七發吾將召枚叟
四愁君莫效張衡擊鮮縱飲時方可嚼蠟橫陳事不情
五百天魔千日酒定中何礙學長生

病起

久病初起常畏風坐臥一室鷗在籠支離腰腳苦無力
行藥十步須扶筇耳鳴忽作秋蟬咽眼眩時見春花濃
終朝一餐腹如瓠以手摩撫噫氣通好客喜來惡客厭

喜生語咲厭生慵西鄰易君昨夜死聞之老淚霑心胸
飢來驅爾走萬里豈云慷慨歌從戎俯仰人意作文字
本趣盡失言徒工厚分資俸進官職感激無旣非初衷
妻孥垂死不一見首邱未及耕田翁零風斷雨怨羈鬼
杳杳魚復連蠶叢我病竟蘇君則已情事相例將毋同
須知生死各天數死非醫罪生非功憂患福祿待相付
惜哉兩鬢如霜蓬但願日日筋骨健騎馬能走城西東
羅氏小園一尊酒及看桃杏今年紅

輓易直庭

病中贏得涕漣漣暫別眞成永訣期孝子有兒天不爽

文人無命我終疑三年從事逢賢主萬里論交識本師

余與君同出順德李學士之門

相許幕僚名位大習之文筆達夫詩

一病纏綿萬念灰參苓雖效數難回情深紅袖生前別

累盡黃山夢裏來

君屬纊前一夕之夢

此後相思空灑涕他生有

福莫多才嘯猿夜斷嘯鵲續蜀道魂歸劇可哀

澤雅堂詩二集卷十目錄

病起雜作

留子相飲酒

二絕句

雜作

朗公邀同人至羅氏園看杏花余以病不赴明日

作此

效韓退之感春

風

種花

長日一首呈朗公

烏兔一首

偶題三首爲發光居士作

衰態

看鏡三章

夜涼

秋至

贈行篇爲李石臣作

去日之日行

壬午中秋無月

不寐四章呈朗公

贈羅雲洲

九日同人虛隨園登高傑堂軍門留飲

庭花

八絕句

送鑑堂歸省

光陰

黃聲駿觀察自龜茲移治莎車索書奉贈

澤雅堂詩二集卷十

烏程施補華均父著

病起雜作

我病初來時心定似止水自生而自戕天意甯如此怪
異昔有徵忠義老可恃百事未一施茲病不足死
少食常苦飢多食卽傷飽飯餘三百步旋轉四隅繞蒸
鴨如蒸壺有項亦知拘肥濃尙不勝叅以菜根齧
觀書坐小齋習靜亦云久隔窗聞履聲一一知誰某倦
來魂搖搖合眼無何有鼻息出齁齁一篇猶在手
客至意識合反復千百言客退喉舌燥往往傷神煩兀

坐閉雙目氣息默自存一靜養諸動藥餌何足論
窗外十圍樹歷亂烏鴉鳴吉凶彼何知盡日聞惡聲我
欲飛彈丸誠恐黃雀驚安得愛兩耳慰以絲竹清
晚臥頗易醒終夕再三起皎月在中庭樹影動窗紙空
腸鳴輾輾廚人睡正美忍飢待晨明疲勞應恤爾
藥鑪火熒熒飲藥爲治病吁嗟草木滋有效亦偏勝五
穀抱中和斯爲百卉聖但能饔飧調自致血氣盛
四方友朋書堆積已盈案伸紙思作報書之未及半客
來頻閣筆意緒遂不貫頗媿陶桓公裁答工詞翰
披衣行中庭颯颯風生樹忽如中酒人敲斜不成步房

宇亦倒懸眼眩屢驚顧酬答怨病夫未敢出門去
閉門柳破綠出門桃落紅韶光病中去此憾將何窮屈
指三月初百草皆昌丰定有芍藥花待此傷春翁
留子相飲酒

我病不出君屢來曲房半日相談諧熒熒燈火止君飲
綠酒命發蒲萄醅腸胃薄弱不勝肉青芹白飴聊相陪
觀君斟酌我亦樂高興不在親銜杯卻思時事兩歎息
酒外尙有無窮懷伊犁一隅十年亂日月不到如夜臺
聖恩勿忍兵力取殘黎淪沒情終哀捐棄盧布九百萬
汶陽歸我方安排夷情反覆軍勢盛揜耳勿及宜奔雷

指揮談笑據全境彼族失計徒驚猜投機之會不容髮
奈何臨事多徘徊紛紛遂欲申六議牢關相距叩不開
通商畫界更他日詐謀誰以剛氣推強可支持弱見侮
令我慷慨思邊才可憐貴人用柔道委蛇相赴中外皆
君姑一醉我一息下土狂論時賢吟送君出戶漏三下
皎月出樹光流階

二絕句

杏花零落百枝空病裏聞知怨曉風要得天公差解事
輕寒勒住小桃紅

白飛晴雪絳圍霞後會應知麗景誇老去空明雙眼在

論文相士與看花

襍作

提戈就行伍慷慨求功名見敵勇戰鬪性命如毛輕此
實壯士節官爵宜爲榮奈何至末流官爵不復爭偏裨
志猥瑣商賈心經營虛額與刻賜筐篋惟自盈相逢問
田宅安知訓練精是輩遇劇賊望風先潰驚幸哉喪亂
久天下將承平

書不能操翰數不能持籌因緣將軍幕肥馬兼輕裘無
能而有好客匪馮驩儔高會叅末座大白偏能浮彈箏
與擊鼓宛轉諧歌喉酒酣一事無博塞房櫳幽大叫幾

作驢馱譎如俳優將軍顧而咲意賤契亦投舐痔多得
車往往千金酬時或化青蠅變亂帷幄謀是輩在軍中
禾稼聚螟螣煌煌逐客令秦法焉可尤

朝士一紙來軍府千金贈古時亦有之干謁今尤盛權
要解攀緣嗜好久探偵上書投所喜接席工爲佞膏秣
合有資文筆還加潤遊士飽而歸征夫貧卽病脫巾縱
未呼吹律恐不競倦矣債帥心勉強相酬應晚近士喪
恥求利視捷徑新茶領一串此客不可更

二十始從軍四十未得休領下鬚鬢尚復持戈矛回
視同輩人建節還擁騶亦或死沙場遺骨委荒邱一身

偶然在列戍天盡頭室家問何有生若春雲浮或自賊
中來鄉里皆敵仇歸心淡欲無絕域甘淹留孤棲良獨
難鹽嫫尋匹儔居然烏有巢穀穀雛啾啾回蠶比交趾
從此多馬流

朗公邀同人至羅氏園看杏花余以病不赴明日作此
五更臥聽東風惡疏雨瀟瀟止還作眼中未見杏花開
意中已惜開將落錢塘將軍邀出遊病起猶難任腰腳
曉晴冠蓋集名園將軍設酒賓徒樂蔣生扶醉燈前歸
爲語斯游誠脫略千樹相倚初陽來淡白輕紅光的皪
將軍袒坐花中間一咲提壺自斟酌賓徒四圍花四照

快意各行無算爵酒闌花墮雪紛紛空際回旋無住著
沾茵拂席有餘妍但恐泥塗失依託將軍歎息久停杯
何異才人晚飄泊愛花正放惜花殘意厚情多賤輕薄
我愁閉置新婦同甚欲出門破蕭索健飯十日三月三
騎馬應勝乘船愕杏花已盡桃花初更有頻婆綻紅萼
紫蝶脫繭蜂離窠花底飛鳴花上掠提鵬挈鷺此園中
爲我重尋看花約賦詩遍贈同遊人衆曰如期公曰諾
效韓退之感春

九年萬里如無家生兒十歲未識爺春風忽吹方寸地
鄉愁客恨俱萌芽丈夫於今四十八頭顱盡白浮霜華

功名所到可知矣將相無種生有涯儻令屈折作丞守
屍高首下尊官衙盛氣相加狂疾動裸罵解效漁陽搥
不如自放江湖上釣船不繫隨風斜林童谿叟往來熟
相逢笑語無疵瑕

春光欲去春人哀不知朱夏隨春來紅花漸稀綠陰滿
堂堂白日難西頽夏長亦足抵春麗疎簾清簟相安排
少年如春壯如夏五十已覺秋風催我生正在夏秋際
暑氣稍薄涼意纔舍我便歸用未晚誰歟落實還取材
一莖兩莖鬢日白宜有秋感無春懷纏綿兒女世閒有
此老怊悵胡爲哉

病夫被春風百體支疲茶譬之樹半枯無花亦舒葉四
時遞推遷冬春適相接坐看號寒蟲漸化穿花蜨

錢塘將軍英雄流愛我憐我代我謀不然粗糲我亦有
誰能萬里干諸侯心親意切肯順承議論不合長掉頭
逾時歷日輒俯聽但嗟龍性難馴柔芻豆一石盡一食
十倍凡馬廝養愁將軍大咲促供給驚駘豈足知驕
追風逐電事誰料死骨亦值千金酬感君知已不忍捨
三年同住崑崙邱西湖茫茫春水綠將軍何日能歸休
萬荷花繞十楹屋我來自駕瓜皮舟

風

聞之韓退之天以風鳴冬茲土冬寂然春至方蓬蓬風
少歲必儉風多歲乃豐禾麥遇風長一雨愁百蟲天氣
既大異地氣殊不同民生天地間受氣安得中治用漢
人例勢屈徒貌從因俗易相守順性多收功寄言專城
吏盍亦徵諸風

種花

貴人種菜如種花耒耜相隨初放衙七十歸田未成錄
肯敝子弟還農家令我直作種花計安知栽芋兼芸瓜
停勻布種勤灌水十日五日俱萌芽蟲傷雀啄更掩捕
秋至漸吐紅黃葩種花竟獲看花報秀才得舉同矜誇

滄洲雪堂二集卷一
肉食蔬食古有別彼哉窮士爭生涯老夫但解種花好
此意眞實誰疵瑕

長日一首呈朗公

少壯幾何時一擲徒悲咤中年幸未衰長日惜多暇遲
遲和議成漸漸防兵罷軍謀贊益稀幕職補奚借引睡
書滿牀慰寂花連榭託之酒興雄激作詩才霸閒尋客
不擇惡謔友常赦詖蕩聊復然蹉跎每自訝出塞三四
年生馬劣能跨喜邀老兵語怒拒豎儒罵窮邊覽形勢
強敵識虞詐外慄仗

天威內治依王化此客豈坐談彼族偏含射造言舌誰

斷吠影聲可怕投杼相公驚倒屣將軍迂避禍龍忽虺
從事冬歷夏堂餐會清晨官燭接良夜抉弊深破局籌
利密彌罅奇士動相嗟老女終不嫁臣精誠易銷天幸
安能藉已矣賦遠遊歸哉乞長假種松蔭先壟傍水搆
精舍綠淨二分竹黃熟十頃稼魚租雜菱芡蠶課及桑
柘細君親無燐雛妾誇嬌姁幼孫當戶抱熱客閉門謝
九州數豪傑八節會姻婭心無將相尊眼有乾坤大公
曰安毋躁待我戎衣卸當如結鄰約兼論買山價

烏兔一首

巨靈持大箕萬族入揚簸粃糠散紛紛存者已不夥此

澤州先生集卷一
實人精華將相乘時可如何久浮湛尙若舟無柁蕭蕭
髮漸稀兀兀齒將墮烏兔日行天厥罰爾當坐我今猶
待人爾忍不待我

偶題三首爲弢光居士作

偶呼小字卻無情大錯何人爲鑄成望眼可憐將老大
託身猶是未分明久依兄嫂羣疑集纔入門庭萬罪生
只有愁心隨慘月流光分照漢家營

凝塵黯黯滿妝臺鳩鳥何心爲作媒雙宿雙飛誰敢羨
一顰一笑總相猜可能弱絮隨風轉自惜幽花背日栽
樂府莫歌三婦豔琵琶聲急不勝哀

灑泣登車意慘然長庚伴月定非緣埋憂來乞無多地
離恨求生第幾天怖鴿聽經應解脫春蠶上箔更纏綿
賣花一樣豐臺女贏得西河老淚懸

衰態

衰態新從病後加齒牙搖動眼昏花安排食品湯徐送
點竄軍書字半斜肝膽猶存知報國文章到老未成家
名臣名士均無分歸作耕夫識字誇

看鏡三章

東齋一客坐看鏡非迂非狂亦非病默然深念浩然嘆
見者三呼兩不應求田問舍平生恥有子賢愚亦由命

此中憂患當語誰葵藿傾陽自天性

窗中日月如跳丸青鬢坐惜霜摧殘功名之會今已矣
英雄慷慨儒生酸旄頭奕奕夜半出光搖海水飛波瀾
彎弓欲射且復息心長力短空三歎

四十八年少壯老天意茫茫尙難曉死生窮達親語人
妄念銷除夢亦好榻來萬里干諸侯富貴眞慚致身早
鏡中骨相仍自奇幾輩冬烘此頭腦

夜涼

細葛衣裳稱體裁夜涼庭院一徘徊月光妨燕驚難定
露氣催花病亦開和議安邊軍事少回圖設務賈胡來

家人勸作歸耕計十畝溪田半草萊

秋至

春夏爲少壯秋至如始衰漸與霜雪近煇煇能幾時煇
煇雖無多成功方在茲不見千畦閒新穀將垂垂百舒
歸一斂堅好充人飢繁華忽零落可慕不可悲芳實儻
足采敢以遲暮辭秋風吹短髮散亂成斷絲兒童憎老
醜我意當語誰

浮雲掩孤月流影初依微秋風卷浮雲還此孤月輝于
時宵正中乾坤入琉璃清光九萬里不見纖塵飛暫暗
得久明浮雲爾何爲長庚一星大耿耿還相依燭茲幽

昏夜功亦如晨曦寒窗試微燿可笑不自知

靜夜聽寒蟲自以悲懷寄應候始一鳴誰云非得意清
霜旣霏霏乃有征鳥厲健羽挾豐毛一出凡禽避可知
神俊姿偏感嚴凝氣訓詁秋爲摯論常難語異持使宋
玉聞登高應破涕

贈行篇爲李石臣作

蜀岳池李生三年我同僚今夏還岳池萬里揚歸鑣清
晨登我堂再拜口有求問生何所云云大母氏周恩勤
徧李宗身賤無以酌願得有道言五花敵榮褒大母入
吾家六十餘春秋逮事曾考妣新婦和且柔委婉妯娒

閒百惱忍卽休人類如十指計較門中羞大父於鄉里
德義服其曹片語釋牙角渙若春冰消母隱屏壁聽排
解時參謀一訟破數家公門不可投迨乎咸同際蜀賊
多如毛大父練鄉兵一方自扞擻母具千人飯餉此少
年豪裂裳縫作旂田野以爲招日出喚僮婢治家嚴教
條良窳無棄物暴殄天訶譙一一歷心手閭閻及廚庖
噉飯卽作事敗戶羣嬉邀傷哉無母雛五雛棲一巢長
兄齊大母次兄隨肩高其三牽衣裾跳擲同猿猱柱也
始及剝弱足行搖搖幼弟懷抱中嘻咲而號咷大母衣
食之燥溼還相收因言哺汝父過眼疑昨朝如何見諸

孫閔閔孤露遭他時漸長成勿忘大母勞各各獻甘旨
及我黃髮飄斯語已念載母壽逾松喬至今登八十食
肉牙齒牢暈眼無昏花垂耳有彩毫過存左右鄰扶杖
杖屢拋諸孫咸納婦生子咸童髻時時取撫弄呼名常
混淆柱於諸孫中實爲寵愛尤今茲萬里歸老人開笑
眸持君一篇詩朗誦述其由此亦近顯揚甯待公與侯
起坐謝李生媿非韓蘇流詩豈足輕重顯揚惟德修雪
水何滔滔火雲正浮浮感生念壽母決別不更留賦詩
答再拜聊供家乘搜

去日之日行

去日之日照我容顏好來日之日照我鬢鬢老乾坤萬
古人百年百年將半猶潦倒何況浮生百年少圖我麒
麟之閣著我鷗鷺之洲天公早爲位置誰能久客諸侯
夜來疏勒城樓坐邊月輝輝低埃火漢家人物問班超
虎頭燕頤何如我

壬午中秋無月

孤館懷歸意空閨念遠情結成雲黯淡遮斷月分明何
況中年過兼之絕塞行淹留逢令節寂寞轉初更製餅
憑誰說提壺只自傾正愁光皎潔偏照影淒清縮地多
奇想還家有近程祈連湧著水疏勒幻拔城良夜團藥

會高樓咲語聲天公定如願冰玉一輪生

不寐四章呈朗公

宵長夢偏短愁似寒潮來霜月入窗戶攬衣起徘徊一
病春歷冬白髮驚相催誰挽西逝日薄暮仍東回奇驥
伏空阜孤鳴何憤哀芻豆豈不飽惜此追風才昂首望
道路但見馳驚駘伯樂近在側歎息難爲懷

種樹南山旁期作十年待交柯高數尋垂蔭亦云美衆
鳥相和鳴上有新巢在春花一日榮零謝有何悔青紅
子滿枝正望幽人采秋風易飄墮忍令泥沙委

老鶴與高人本結素心友毛羽遭摧傷簷下襍褊久官

奴給稻粱食料亦云厚皓月出重霄高鳴時仰首遙遙
萬里心一舉離塵垢秋風適不便竟落鷹鷂後冲飛嗟
未遂願得舊巢守新雛待長成飲啄終林藪依依高人
旁意實戀儕偶頻年供養勤常恐成孤負

一日復一日一年還一年青春不可再浩浩東流川我
生有何似頗似千斛船篙櫓豈不具物物皆精堅逆風
連夜作白浪高於天長年慘無色百丈相爲牽十里更
五里斜日嗟西懸何當飛廉轉且就陽侯便挂帆斜日
外騏驥難爭先長年飽喫飯舵尾邀攤錢扣舷發歌唱
勞苦慰從前

贈羅雲洲

羅生四十七少我又一年皮骨縐瘦透有似奇石然五
歲走萬里作客貧無錢求官仍未獲徒穢昭山田計更
拙於我於我殊有緣住我東頭屋一室安枯禪多病精
氣弱亦以病自全有時談世事議論甯不偏胸中把握
定自較依違賢依違世所尙子道宜迤邐兩拙適相遇
盍各存其天毀方亦奚益屈折難成圓賤貧與貴富命
在人何權魏徵忽斌媚醜者時而妍疏鐙照虛壁夜話
方連綿慰生復自慰嘆息吟斯篇

九日同人虛隨園登高傑堂軍門留飲

十年作客功名薄萬里登高感慨同
寒色滿城鴉趁日秋聲徧野馬呼風
心游水國將歸棹眼見天山已挂弓
把酒預談來歲事黃花應對故園叢

天公故送重陽冷地主能留過客歡
老筆縱橫詩胆大少年豪宕酒腸寬
霜紅林果堪分餉雪白谿魚更勸餐
從古勞人多健骨茱萸安用醉中看

庭花

深紅淺白繞闌斜小草秋來豔色誇
一夜新霜憔悴盡忍寒惟有未開花

八絕句

和議初成戰事休歸心齊唱大刀頭伽師城外雲如幕
知是闔愁是旅愁

文苑儒林未見推功名聊欲試邊才蕭蕭兩鬢天山雪
爲覓封侯覓得來

崑崙南去勢回旋寶氣熊熊夜燭天金穴由來依介石
玉河從不涌貪泉

伊麗河邊戰血乾喜看漢月出團圞清光分照千家夢
卻似胡霜一樣寒

政典刑章日整齊治功思奏玉關西老夫不著安邊策
但愛莊生說馬蹏

紛紜撫字與催科列考其如下下何今日試詢齊贅壻
柴胡桔梗已無多

園官何事易生瞋爲損連畦菜甲新籬落太疏牆太短
不須鵝鴨怨比鄰

老態頻增壯志灰樵兄漁弟願追陪迴風吹得歸雲轉
還有千峯好雨來

送鑑堂歸省

三載青油幕方叨氣誼親身爲投筆吏心有倚閭人旁
午書應少同寅事可均假歸春又至一路綵衣新
談往燈頻翦扶衰藥更搗時邀老人笑故作小兒囁

聚迎嬌妹分遺付瘦妻封侯無限好樂意總難齊
府主憐才甚家人當客看留忘官事重去慰母心難許
捧重來檄祈加暫別餐天涯欣握手應破菊花團
光陰

光陰輕一擲忽忽雪盈頭老矣猶爲客悲哉獨感秋寒
天雕奮擊晚歲稻豐收人事誰能料提壺自勸酬
錢唐張節使言論每相推肝膽宜兵事文章見吏才名
高官未稱物忌我偏哀絕塞逢知己飄零且舉杯
客行三萬里騎馬更何之垂老仍通俠多窮不坐詩從
來作人傑亦復值天時千古風塵下英雄若箇知

生計歸誠好交情別最難上公如手足下士有心肝漢
月三秋滿胡霜十倍寒拚教茗水上耽誤釣魚竿
跌宕青油幕長居揖客名軍中咲吳語詩外有邊聲新
國難爲政強鄰屢改盟安危百年計時復訪書生
黃聲駿觀察自龜茲移治莎車索書奉贈

劫灰飛盡好官來整理龜茲老手推星海側邊行水去
天山平處度田回小兒漢字勤勤課下戶官糧緩緩催
今日莎車移錦節甘棠又傍玉河栽